



30. Aprili 2026

UPA2026/47

Uunga siunnersuut: SIKUKI Nuuk Harbour A/S aamma Nuummi umiarsualiviliorneq pillugit Inatsisartut inatsisaata allannguutissaatut siunnersuut.

(Ineqarnermut, Attaveqaasersuutitut, Isorliunerusunut Upalungaarsimanermullu Naalackersuisoq)

Siumut sinnerlugu Naalackersuisut inatsisissatut siunnersuutaannut qujarusuppugut.

Naalackersuisut siunnersuuteqarnerminni nunatsinni ineriartortitsineq pillugu pingaarutilimmik saqqummiussipput. Tassa umiarsualiviit nunatsinni pingaarutilerujussuit aaqqissuuteqinneqarnissaat pillugu saqqummiussillutik.

Siumumiit siullermik siunnersuummi siunertaq paasilluarparput, kisianni suliaq iluameersumik pitsaasumik illoqarfinnut aammalumi nunaqarfinnut isorliunerusunullu sunniutissai pillugit apeqqutinik arlalinnik qulaajaatitseqqaarusuppugut.

Umiarsualivinnut annerusumik aningaasaliinissaq pisariaqarluinnarpoq. Nunatsinni inuussutissarsiutitta pingaarnerpaartaani aalisarnermik ingerlataqartunut atugassarititaasut aaqqiivigineqartariaqarmata. Taamaattumik inuussutissarsiorneq aammalu sinerissami ineriartortitsineq umiarsualivinnik nutarterinissaq isumannaatsunillu pilersitsinissaq pisariaqartitsisorujussuuvoq.

Inatsimmi matumani SIKUKI Nuuk Harbour A/S-mi piginnaasat nunatsinni tamarmi atornerqarsinnaangornissaat eqqarsaatigineqarpoq. Taamaattoq oqaatigineqassaaq siunnersuut taamaallaat teknikkikkut allannguutaanngimmat, kisiannili umiarsualivinnik ingerlatsinermut aammalu aningaasalersuinermit tunngatillugu aaqqissuussaanerit allanngortinneqarnissaat matumani pineqarpoq.

Siumumiit isumaqarpugut nunatsinni attaveqaasersuutit ineriartortinneqarnissaat nuna tamakkerlugu iluaqutaasariaqartoq – kisiannili sumiiffinni inuussutissarsiornikkut periarfissat assigiinngitsut eqqarsaatigalugit naligiissumik ingerlanneqartariaqarpoq.

Siunnersuummi ersarippoq umiarsualivinni atuisut akiliuteqartinneqarsinnaanerit maanna annertusarneqalersoq. Siumumiit maluginiarparput inatsisissatut siunnersuummi tusarniaanermi ullut tamarluinnaasa talittarfinnik atuinerpaajusut tassalu aalisartut taakkualu kattuffiat KNAPK tusarniaanermi akissuteqaatini ersinngitsut. Taamaattumik Siumumiit isumaqarpugut ataatsimiisitaliap taakkua isumaat aamma ersarissumik paasisariaqaraat, kingunerisinnaasaanillu paasisaqarfigalugit.

Umiarsualivinni akitsuutit inuussutissarsiutinik ingerlatsinermut aammalu innuttaasunut akigititanut sunniuteqassasut naatsorsuutigineqassaaq. Tassami atuisut umiarsualiviit maanna 270 mio. kinguaattoruteqarfiusut aaqqissuunneqarnissaannut pisussaaffeqalertussanngussammata.

Siumumiit maluginiarparput nalunaarutigineqarmat aningaasaliinissamat aammalu attartornissamat periarfissat pitsaanerulernerat, tamanna ineriartortitsinermut iluaqutaasinnaammat. Malugaluguli



tamanna illoqarfimmiunnaq atuutissasoq naatsorsuutigineqarsinnaammat. Tassalu tamakku tamarmik inuiaqatigiinniit tamani isorliunerusuni aammalu nunaqarfinni akileeqataaffigineqarnissaat pissaaq. Tassa nunaqarfinni isorliunerusuni illoqarfinnilu minnerni najugaqartut tamarluinnmik maanna akilersuitinneqarnissaat annertusissasoq naatsorsuutigineqassaaq.

Siumumiit isumaqarpugut maani inersuarmi isumaqatigiissiortoqartariaqartoq, tassami nunatsinni umiarsualiveqarneq assersuutigalugu Qasigianguani, Maaniitsumi, Sisimuni, Aasianni, Kangaamiuni, Qaarsuni nunaqarfippassuarnilu umiarsualiveqarneq pitsanngorsarneqassappat partiit akimorlugit ukiunut qulikkaartunut isumaqatigiissuteqartariaqaraluarpuq. Taamaasiornikkut aningaasanut inatsimmi aningaasat immikkoortinneqartartut annertusinerisigut ullumikkut kinguaattoorutaasut angummaffigineqalernissaat isumaqatigiissutigalutigu.

2015-imi aningaasanut inatsimmi allassimavoq Sikukip pilersinneqarneranut atatillugu Sikuki sinerissamut siammarneqassanngitsoq. Tassami umiarsualiviliorneq naammassippat ingerlatseqatigiiffimmut ilanngutitinnissaa pissasoq siunertaalluni. Maannali tamanna qimalluguinnarlugu Sikuki sinerissamut siammarlugu annertusarlugu ingerlasoqalernalernera Siumumiit isumaqatigiissutaasimagaluartumiit allarlunnarmut ingerlasoqalernalerna assorujussuaq ernumalersitsivoq.

Naalakkersuisunut ersarissumik apeqqutigerusupparput piginnittuunermut politikki isumaqatigiissutaasoq maanna sumut killinnersoq? Naalakkersuisut siulittaasuata tamanna oqaasertalissagaa piumasaraarput. Tassami ingerlatseqatigiiffiit imminnut ilassuuttutu kattussuunnissaat siunertaasoq qimanneqarsimanersoq Siumumiit ersarissumik paaserusupparput.

Siumumiit aamma maluginiarparput Qeqqata Kommuniata aammalumi inuussutissarsiortut assut aarlerillutik oqariartornerat. Eqiterutsitsineq matumani pilersinneqalersoq allaffissornerlu Nuummumut eqiterutsinneqalersoq sakkortuumik uparuaatigivaat – tamannalu Siumumiit isumaqarpugut ilumoortoq aamma ataatsimiisitaliami ilumut tamanna attanniarneraat pissangalluta naalaassavarput.

Nutaarsiassani atuarsinnaavarput maanna Sikuki Nuummi talittarfiaasualiornissaminut atsioqatigiinnissuteqartoq. Siumumiit piumasaraarput ataatsimiisitaliami tamatumap kingunissaa qulaajarneqassasoq. Tassami Siumumiit isumaqaratta taamaaliornerup malitsigissagaa sinerissami kilisaatit usingiartarnerat annikillissasoq. Allatut ersarissumik oqaatigalugu Sisimiuni Manittsumi Aasiannilu fabrikkit tunisassiortarneri annertoorujussuarmik annikillissasoq Siumumiit ernumassutigigatsigu. Taamaattumik piumasarissavarput tamanna qanoq kinguneqassanersoq ataatsimiisitaliami qulaajarneqassasoq qulakkeerneqarlunilu Nuummi kilisaatinut talittarfik sinerissamut sunniuteqarnerlussanngitsoq. Aammalu tamanna ukiuni tulluuttuni qulini qulakkeerneqarsinnaanersoq paasisariaqarparput. Inuussutissarsiortut kilisaataatillit sumi usingiarusunnerusarnerisut aamma ataatsimiisitaliami qulaajarlugi paasinierneqassasoq piumasaraarput.

Siumumiit taamak oqaaseqarluta siunnersuut sanaartornermut ataatsimiisitaliamut suliarineqarnissaat innersuullugit.